

茶


録

考

話

頁

5 曾 1  
571  
4 止





明 僧 5  
號 571  
卷 4 止

茶餘客話卷十

御窑磁器超越前代規模款識多出刑部主事劉伴  
阮監製伴阮名源又有郎窑巡撫廷佐所造仿古酷  
肖今之所謂成宣者皆郎窑也又熊窑亦不多讓近  
則年窑唐窑皆入賞鑒  
成窑酒杯有名高燒銀燭照紅粧者一美人持燈看  
海棠也錦灰堆者折枝花果堆四面也鷄窑者上畫  
牡丹下畫子母鷄也鞦韆杯者士女秋千也龍舟杯





者鬪龍舟也高士杯者一面畫茂叔愛蓮一面畫淵明對酒也娃娃杯者五嬰相戲也其餘滿架葡萄及香草魚藻瓜茄八吉祥優鉢羅花西蕃蓮梵書名式不一皆描畫精工點色深淺磁色瑩潔而堅雞缸寶燒碗硃砂盤最貴價在宋磁之上采竹垞稱芳草鷄缸當亦牡丹之類余舊藏酒器皆鷄冠花下子母鷄凡五其式必多當不止此數種也

供春壺式茗具中逸品其後復有四家董翰趙良袁錫其一則時鵬大彬父也大彬益擅長其後有彭君

寔龔春陳用卿徐氏壺皆不及大彬彬弟子李仲芳小圓壺製精絕又在大彬之右今不可得近時宜興砂壺復加饒州之瑩光采射人却失本來面目陳其年詩云宜興作者推龔春同時高手時大彬碧山銀桂濮謙竹世間一藝皆通神高江村詩云規製古朴復細膩輕便堪入筠籠攜山家雅供稱第一清泉好瀹三春茗昔杜茶村稱澄江周伯高著茶茗二系表淵源支派甚悉

陸子剛治玉鮑天成治犀朱碧山治銀濮謙治竹又



嘉興王二漆竹蘇州姜華雨莓菜竹趙良璧黃元占  
 歸懋德治錫李昭一作荷葉李馬勳治扇周柱治鑊  
 嵌呂愛山治金玉小溪治瑪瑙蔣抱雲王吉治銅雷  
 文張越治琴范昌白治三弘子楊茂張成治漆器江  
 千里治嵌漆胡四治銅爐談氏箋顧氏綉張氏爐洪  
 氏漆孫春陽燭又文衡山井方扇不書及近時吳興  
 薛晉侯銅鏡欵曹素功製墨吳穆大辰刻字顧青娘  
 王勿君治硯張玉賢火筆竹器皆名聞朝野信今傳  
 後無疑也濮謙壬午生與蒙同庚嘗贈詩云滄海茫

茫感劫塵靈光無恙見遺民少將楮葉供游戲晚向  
 蓮花結淨因杖底青山為老友窗前翠竹似閑身堯  
 年由子欣相並何處名山許卜鄰  
 陸放翁詩遊山雙不借取水一軍持古今注漢文帝  
 履不借以臨朝漢時已有草履矣軍持淨瓶也出佛  
 經賈島詩我有軍持憑弟子岳陽江裡汲寒流隱背  
 爬背也李鄴侯以松膠枝作隱背偏提酒器也見說  
 郭唐詩亦有用者護朽見菽園雜志滑稽吸酒曲器  
 名零丁尋人招帖也剛卯古佩印名模稜門櫟也可



左可右佛影竹也見清異錄君遷牛奶柿司馬溫公  
 名苑云君遷子如馬奶律令雷邊鬼捷與雷同速見  
 桂苑叢談藕覆婦人膝鞞始于楊妃見致虛雜組璫  
 籍登箔也見文經餘志響箭今之髀頭見宋書馮馬  
 扇馬見唐書杯斫木札也湖諫吹唇作聲觥粟鼓管  
 卷蘆為頭截竹為管即笳管蒸餅即胡餅並見筆塵  
 裝潢見唐六典筆神曰佩阿覲神曰淬妃墨神曰回  
 氏紙神曰尚卿筆神又曰昌化瑟曰文鶴笙曰采庸  
 鼓曰送君鐘曰華由磬曰洗東皆仙樂俱見致虛雜

組筮梳一名落塵又名洛成見奚囊橘柚不落為酒  
 杯不律為筆扶老柳樞皆杖名見表異錄麥光紙栗  
 尾筆見坡詩溺器曰夜瀦見唐人集通峭承梁小柱  
 也蘇頌詩自知伯起難通峭不及淳于善滑稽魏收  
 有通峭難為之語匹製即今之沓杯俗名套杯外大  
 內小古人不通五六古今詩話刁約使契丹詩曰餞  
 行三匹製交間今帳房之類交木而支如交椅之稱  
 胡床即交椅

六經無茶字始見王褒僮約爾雅價茗茶茶即茶也



然古人多稱飲茶始于三國吳志章曜傳孫皓每飲  
 羣臣酒以七升為限嚶飲不過二升或為裁減或賜  
 茶茗以當酒又飛燕別傳后夢見帝賜坐命進茶左  
 右奏云向侍帝不謹不合嚼此茶然則西漢時已有  
 之又謝安詣陸納但設茶果至晏子春秋食脫粟之  
 飯炙三戈五卯茗菜非飲茶之謂開元中靈岩寺有  
 降魔師教人不寐人多作茶飲因以成俗見續博物  
 志物類相感志芽茶得盞不苦而甜古人煎茶必加  
 薑鹽余在杭州有詩云詩人偏好事何苦着薑鹽未

免為古人所嗤然烹茶取甜子所不解安能起古人  
 而問之今內廷皆用熬茶尚有古意

德州羅酒亦北酒之佳者漁洋詩云玉井蓮花作酒  
 材露珠盈斛潑新醅清冷錯著康王水風韻還宜叔  
 夜杯山薑亦稱吾州酒色白清味潔鮮東坡所謂着  
 錯水也屢八篇咏官京師仿為之德州又有露酒色  
 如黛漆味比醍醐俗呼墨露見查悔餘詩注問之德  
 州人不知也滄州酒止吳氏劉氏戴氏諸家餘不盡  
 佳葢藏至十年者味始清列市中安可得耶按羅侍



御飲瞻崇禎丁丑進士官御史巡按河南剛直有聲  
嗜飲傳釀法色味雙絕至今猶呼羅酒滄州城外酒  
樓青城面河列屋而居明未有三老人至樓上劇飲  
不與值次日復來醉酒家不問也三老復醉臨行以  
餘酒瀝澗于外河中水色變以之釀酒味芳冽僅數  
武地耳過此南北水皆不佳劉紫亭鳳翔爲余言之  
甚確予在京師紫亭歲致滄酒非市中物也漁洋答  
謝方山詩白家烏帽重屏裏初試紅泥小火爐恰是  
陵州酒船到不愁風雪壓層蘇酒車冒雪遠衝泥尺

素殷勤謝傳題一樹山查紅破蕊花前催進玉東西  
此漁洋晚歲之筆頗得酒中三昧風致可想

袁石公觴政八之祭云凡飲必祭所始禮也今祀孔  
子曰酒聖夫聖無量不及亂觴之祖也是爲飲宗四  
配曰阮嗣宗陶彭澤王無功邵堯夫十哲曰鄭文淵  
徐景山嵇叔夜劉伯倫向子期阮仲容謝幼輿孟萬  
年周伯年阮宣子而山巨源胡毋彥國畢茂張季鷹  
何次道李元忠賀知章太白以下祀兩廡至若儀狄  
杜康劉曰墮焦革皆以醞法得名無關飲徒祠之門



垣以獎醜客亦猶校宮之有土主梵字之有伽藍也  
聖人吾不得而見之矣二千二百餘年中四配十哲  
十四人耳而阮氏居其三醉鄉閱莫有盛於吾家  
者矣

今人飲酒杯下襪以托子未知所昉馮益都相國宴  
諸鴻詞翰林于萬柳堂酒酣指此爲問汪荅文以爲  
古無此製是也毛大可稱卽古之舟也引周禮註疏  
爲証益都命走馬取書似有所本然與杯不相屬予  
見宋李濟翁資暇錄一則云始建中蜀相崔寧之女

以茶杯無襯病其熨手取碟子承之旣啜而杯傾乃  
以蠟環碟子中央具杯遂定卽命匠以漆環代蠟進  
于蜀相崔大奇之爲製名而話於賓友人人以爲便  
于是傳者更環其底愈新其製以至百狀此爲茶器  
而設資暇錄引此云貞元初青郾油繪爲荷葉形以  
襯茶碗別爲一家之樣今人多云托子始此非也蜀  
相卽昇平崔家按此與今之盃托製甚合前人有辨  
之者周禮司尊彝之職曰六彝皆有舟鄭康成曰舟  
尊下臺似非今酒盃之製也西河一時強論耳



俗語云酒令嚴于軍令亦末世之弊俗也偶爾招集必以令爲歡衆奉命唯謹頽首聽命恬不爲怪陳畿亭云飲宴苦勸人醉苟非不仁卽是客氣不然亦盡俗也君子飲酒率真量情文士儒雅槩有斯致夫唯市井僕役以逼爲恭敬以虐爲忼慨以大醉爲歡樂士人而效斯習必無禮無義不讀書者畿亭之言可爲酒人下一針矣偶見宋小說中酒戒云少喫不濟事多吃濟盛事有事壞了事無事生出事旨哉斯言語淺而意深又畿亭小飲壺銘曰名花忽開小飲好

友略敘小飲凌寒出門小飲冲暑遠馳甚熱不可遽食小飲珍醢不可多得小飲真得此中三昧矣若酣酒流連俾晝作夜尤非向晦宴息之道亭林云樽壘無卜夜之賓衢道有宵行之禁故見星而行非罪人卽奔父母之喪酒德衰而酣飲長夜官邪作而昏夜乞哀天地之氣乖而晦明之節亂所係豈淺鮮哉法言云待坐則聽言有酒則觀禮何非學問之道元人姚文奐詩云曉涼船過柳洲東荷花香裡偶相逢剝將蓮子猜拳子玉手雙開不賭空猜拳賭空皆



詩料也卽今酒令之猜枚前後不放空也

甲戌春同鄉宴寓齋閣飲竟一晝夜歌咏之餘諧謔  
間作吳山夫仿石公之說評諸子曰尚友如廉頗據  
鞍不肯下人北泉如香槽滴酒不甚洶湧而涓涓不  
休吾山如神魚縱壑或出或入出入意表大冶如韓  
信將兵多多益善東冶如橫瀆之水一洩而盡賓南  
如精衛填海每不自量璜水如李陵敗北一以當千  
南生如諸葛出師鞠躬盡瘁死而後已若僕則如老  
僧持戒律百磨不能破又如嚴顏有斷頭將軍無降

將軍也子曰請以評諸公之詩可乎山夫如光武遇  
小敵怯遇大敵勇尚友如齊東大鳥三年不鳴鳴則  
驚人南生如凌波仙子一步一止令人目蕩魂與冰  
瑣如玉卮無當價值千金大冶如黃河之水滾滾而  
來東岩如秋鷹盤空不肯輕擊賓南如隱娘劍術一  
擊不中恥爲再擊若僕則如春雨淋漓不擇地而施  
沐膏者固多而怨浴者亦不少也

瑤按胡賓南名一鶴子癸未同年

辛巳冬舉消寒會酒令集四書語作聯句自一字至



十餘字凡數百聯癸未冬紫坪入都復舉是令因閱  
查浦輯聞紀朱竹垞行酒令舉成語一句合平上去  
入者即天子聖哲類也竹垞舉康子饋藥兵刃既接  
二句查浦思索竟夜不得心火迸發左耳遂聾同人  
因復舉為酒令子與紫坪即席引數十句不知查浦  
何以窘迫至是而竹垞亦僅思得二句殊不可解附  
錄于後

君子上達 何以報德 妻子好合 兄弟既翕  
天下大悅 能者在職 邦有道穀 涇以渭濁

忘我大德	生有聖德	充耳琇寔	神保是格
瞻彼旱麓	王道正直	言以道接	沉而冒色
雷夏既澤	天九地十	咸仰朕德	宏父定辟
天禍鄭國	天子建德	端冕摺笏	天子令德
惟彼四國	君子是識	天子建國	公子仰悅
司馬仲達	萌者盡達	寒暖燥濕	毋有障塞
元酒在室	鍾鼓既設	天子下席	君子進德
天子視學	天子用八		

肆馬鞭者于捍內藏一劍行路者藉以防賊人多用



之按元阿隣帖木見文貞王官戶部尚書有獻鞭者  
製世精拔鞞去之則一鐵簡在內王喜示夫人夫人  
云王平曰曾以事害人慮人害已則當防護之若無  
此心則不必用此見元楊元城山居新話

秦文公作旄頭見列異傳黃帝作旗職又作鼻旄曾  
昭公作弁見世本燧人氏作髻女媧氏作竹笄赫胥  
氏作木梳堯以銅為笄周文王作珠翠又名步搖笄  
唐高祖作反縮髻黃帝作几見李尤銘舜作玉明扇  
又作漆器見古今注少康子興作甲築造瓦見世本

蚩尤作戈戟見呂氏春秋又作劔鏃見管子鑿齒作  
楯見山海經黃帝臣揮於作弓夷牟作矢見世說荀  
卿云倕作弓浮游作矢見山海經少皞生般是作弓  
矢黃帝又作琴絲作城郭禹作宮室伯益作井見世  
本及博物志神農作權伶倫作權度量胡曹作衣裳  
見呂氏春秋太公作九府錢見漢書神農作耒耜或  
云倕作皇甫陰作樓及犁見魏略夙沙氏作鹽帝女  
儀狄造酒見戰國策鯀服牛又作城相士乘馬臘作  
駕三人皆堯臣見世本韓哀侯作御舜造筆見博物



志又曰蒙恬造筆蔡倫造紙堯作圍棋烏曹作博見  
世本齊夷陵王暉作側揪棋局見馮鑑續事始老子  
作樗蒲黃帝作蹴鞠見博物志劉向作彈棋見西京  
雜志曹植作長行局卽雙陸也見後魏李邵序漢武  
帝作藏鈎晉摯衛尉作四維戲紙局木棋見李秀賦  
周武帝作象戲見後周書紂作粉見博物志尹壽作  
鏡見天中記岐伯作鼓吹見蔡邕初志帝俊八子作  
歌舞見山海經又云陰康氏作舞呂氏春秋云舞是  
陶唐氏作神農作琴伏羲作瑟蒙恬作箏師延作箏

篋帝學作鼓鞀又云偃作女媧氏作簫見禮記風俗  
通云舜作簫山海經云炎帝伯陵作鍾黃帝作清角  
女媧氏造笙簧隨作竿女媧氏臣見世本商辛作塤  
蘇成公作箎見世本漢時邱仲作笛見風俗通黃帝  
始作釜甌見古史神農作釜見周書孟莊子作鋸鑿  
見古史夏少康爲箕箒見古史夏昆吾氏作瓦鳥曹  
氏作磚俱見古史公輸般作石磴偃作銚見世本蚩  
尤作治見尹子黃帝臣雍文作春見世本赤翼作杵  
見呂氏春秋伏羲作網見古史詹何作綸鈎及鉞舜



作瓦棺土槪禹作伺風鳥卽相竿見古今注黃帝作  
斧鉞見與服志黃帝作刀見洞冥記赫連氏造梳見  
炙穀子明太祖見道人作網巾頌其式于天下又謝  
宗可集有咏網巾詩則不始太祖矣黃帝臣作屣履  
見世本舜妹嫫作畫見說文岐伯作鼓吹見蔡邕禮  
樂志陸機賦云原鼓吹之所始蓋稟命于軒皇  
京師人擘草麻梗爲小片塗硫黃于其末呼之曰取  
燈杭州人有以松木爲之者曰發燭按史載周建德  
六年齊后妃貧者以發燭爲業又清異錄云夜有疾

苦發燭之緩批杉木染硫黃遇火卽焰呼爲引兒  
放翁詩天矯竹如意鱗皴松養和養和卽藥背也皮  
襲美以五物贈魏不琢有桐廬養和烏龍養和  
虎子一曰槭窻窻音豆漢人以玉爲虎子

江淮舟子使篙曰一張兩張逆風張帆曰折搶太白  
下涇縣陵陽溪詩云漁人與舟人撐折萬張篙蓋唐  
時已有此方言又庾闡揚都賦葉子捨風榜人逆浪  
卽折搶之謂



卷十終

茶餘客語卷十一

淮故

宋楊道孚克一為歷陽法曹遺呂榮公詩云雨綠霜  
 紅郭外田山濃水澹欲寒天參軍抱病陪清賞一檄  
 呼歸亦可憐道孚為張宛邱甥山谷有題道孚畫竹  
 詩所謂人物英俊有外家風即此詩可想見其標致  
 惜所著不傳耳晁无咎亦有贈文潛甥楊克一學文  
 與可畫竹詩



龔聖予畫馬世已無傳聞大內藏名駿骨圖云係高江村所獻孫退谷得其山水一卷筆意似太小米極其瀟灑上題詩云谷口長松澗底藤石橋山路晚登登囊琴斗酒來何暮空負寒齋昨夜鐙小隸極高古後有劉青田跋

宋東楚湯垕字君載輯畫鑒云龔聖予身長八尺碩大美髯讀書爲文能成一家法畫馬專師曹霸得神駿意人物亦師曹韓山水師米元暉梅菊花卉雜師古法卷後必題詩或替跋皆新奇嘗自畫瘦馬題詩

曰一從雲霧降天關空進天朝十二閑今日有誰憐駿骨夕陽沙岸影如山此詩膾炙人口嘗作雲山圖藁五冊傳于家僕曾見之乃生平所臨畫稿亦奇物云云先生在日當世已稱得片紙如得連城璧今日豈易多得先生止一子名浚卽凭其背畫馬者

吳立夫稱翠巖作文宋瑞陸秀夫兩傳類遷固陳壽以下不及又有題翠巖古棋經詩邱季貞洗馬梓陸備合徐仲車傳以行古棋經未見傳本

朱竹垞謂畫終南進士者南唐周文矩蜀石恪汴京



楊裴皆設色爲之至龔高士易以深墨其法倣趙千里丁香鬼也離奇變化自比書家草聖世傳水滸三十六像亦高士筆而明吳承恩爲之贊

宋僧權道衡入市鬻漢印一方酌價已定歸而取值道龔高士至以十五緡買之肆主人復告以故高士歸以語女曰大人亦奪人所好耶高士卽持送權曰先生愛請藏諸高士謂在彼猶在此也權亦曰彼猶在也相讓久遂沉諸淵而別高士之女誠不凡紫坪謂何不還之肆主人子謂主人亦不受終當沉淵耳

元楊元城著山居新語載陸樞密君實挽張鄧州世傑詩云曾聞海上鐵斗膽猶見雲中金甲神張擁兵海上一夕大風雨張舟覆翌早獲屍棺殮焚化胆大如斗不能焚諸軍感慟忽雲中見金甲神云今天亡我關係匪輕後身出當恢復矣公此詩全篇不傳二語傳忠烈尤耿耿也又載莫兩山傷丁氏故基題一絕于太虛堂疎雨斑斑灑葉舟前山喚客作清游芳菲消歇春歸後野草荒田一片愁文本心典淮郡蕭條之甚謝賈相啟云人家如破寺十室九空太守若



頭陀兩粥一飯今淮人尚有兩粥一飯語

葉公政字克明元至正甲午以浙西幕使轉餉鄂州與丹陽束子章訂交未幾子章赴汙以資囊付克明克明令子章手緘藏之越兩月子章友朱君讓來語克明日子章人蓮臺湖遇盜死昔寄囊中有某物在克明日子章死家無恙也當質之其家明以付汝君讓竟去明年克明歸坐丹陽驛要束氏子及君讓至徵子章手緘得鈔二百五十緡黃金五十兩銀三百兩珠八千顆衣帛有差歸之束氏另緘鈔五十緡黃

金五兩珠一千顆有朱題封歸之朱氏兩家具謝克明俱辭王逢有葉公政還金辭序稱葉爲淮陰人國初宣政院都事李寔之子韓林直學士蟾心之從子也又云前國史編世官膠西張復初嘉葉高義爲著還金記稱葉讀書淡榮利嘗從平章克復池之諸縣破蘭溪渠魁徐貞一平蘄水塞司輜糧四年無纖介誤平章七薦平書不報

高志康安宣德中由選貢擢南宮今由杭州守仕至浙江參藩忤上官有詩云眼中絳瞿非吾侶昔日



龍憶共朝初在南宮有惠政鄰邑飛蝗獨不入境民  
歌之曰侯宰南宮民和政通蝗不入境今之晉恭朱  
竹垞明詩綜采焉邑南有李陽冰廟碑高丈餘歲久  
祠碑已仆一日祈雨至見碑石巨非千人不能起立  
禱曰神有靈碑自立安當新其祠次日雷雨大作四  
野霑足竟夜至天明則碑已卓立庭際遂具其事上  
聞請新其祠召工薙草獲錢六萬緡遂爲修葺之需  
期月而廟工成

宋潛溪佶王先生毅小傳云昔者山陽殷子通以儒  
術教授里中人薰爲良善者衆及鄰境寇作子通率  
弟子起殲之長吏惡攘其功使人殺子通其門生毛  
術手刃殺者梟首以甘心焉君子多其義其事與王  
先生絕類

洪武中刑部尚書楊靖逮一武官鞫之門卒檢其身  
得一大珠僚屬愕然靖徐曰安有許大珠此僞物欺  
人令擊碎之太祖問之曰靖此舉有四善他人見奇  
寶必獻朕求容悅靖不然可謂以道事君一善也其  
人藏珠必有所投獻以陷他人是一珠起大獄靖有



陰德於人二善也若一卒得珠因而嘉獎由是趨風  
求獲人將受法外之苦能杜小人僥倖三善也且人  
處常易處變難今千金之珠猝然至前不爲動竟擊  
碎之有過人之識應變之才四善也尚書才臣也未  
竟其用以冤死明史云尚書字仲寧臨難之日作絕  
命詞云可惜跌破了照世界的軒轅鏡可惜顛折了  
無私曲的量天秤可惜吹熄了一盞須彌有道燈可  
惜墮碎了龍鳳冠中白玉簪三時三刻休前世前緣  
定身後建祠于新城東門之下關曰昭恤院後卽其

墓久之蕪不治正德中潘伯和中丞重爲修整尋其  
嗣奉祀後代已絕潘氏子孫每清明上塚必至尚書  
墓前奠盃酒孟飯遵中丞之教三百餘年

武宋幸清江浦過淮都御史叢蘭總兵官顧仕隆迎  
鑿獻金牌花紅綵帳帝戎服簪花鼓吹入城駐尚書  
金濂第時金已故以後樓居劉美人復至山陽縣儒  
學入視先賢像至教諭書舍取通鑒一部去住三日  
遊各寺廟又偕內監等駕小艇網魚積水池舟小人  
衆覆溺池中隨從官及地方大吏州縣等齊入池爭



拔得出急治之驚悸成疾次日登舟渡黃北行金尚  
書故第在舊城後人呼其後樓曰劉美人簪花樓聞  
當時供頓必進鮮花朶各種悉具曰凡數進  
張懿簡鵬爲理漕御史作自警銘詞書于淮陰行臺  
曰嗚呼小子淑慎爾止爾公爾廉天必福爾爾貪爾  
暴天必禍爾爾肯畏天天肯培爾爾忍欺天天忍覆  
爾福善禍淫天寔由爾栽培傾覆天不爽爾天維顯  
思敢不敬爾庶幾夙夜于時保爾書揭座右朝夕警  
爾嗚呼小子淑慎爾止

沈景倩野獲編紀嘉靖三科狀元之異辛丑狀元沈  
坤歷南祭酒憂居倭至散家貲募鄉兵自教練之賊  
縱火延燒官兵却祭酒率所部親當矢石射中其魁  
城上人望之呼曰狀元兵未幾倭復以二十二船從  
泗而下焚殺尤慘祭酒大破之巡撫李薦其才兼經  
畧功收禦侮起爲北祭酒爲同鄉胡給事應嘉所構  
陷瘦死淮守范櫝迎合成之人皆以爲寃其癸丑狀  
元陳謹乙丑狀元范應期皆殞非命

范櫝字養吾文正之裔嘉靖庚戌進士由部郎出守



淮郡時景王初出藩挾貲甚衆有大盜某密謀劫王布黨千餘人自天津至南昌分徒五百人往來偵遊一日晚范衙鼓初罷門卒報有貴客至已僦居潘氏園以寓孥者問有傳牌曰無有何之見從者甚衆而更出入心疑盜陰選健卒數十人易衣如庄農曰若往視其黨入市者佯與飲中挑與門相執贄以來戒曰慎勿言捕賊也卒既去范命輿謁客西門遇持者前訴卽收之比反得十七人陽怒罵曰王舟方至官吏不暇食暇問汝門乎叱令繫之入夜傳令吏飽食

以待漏下二十刻出諸囚于庭厲聲叱之吐寔如所料羣賊遁散所留孥山東妓也于是飛檄各省擒其餘黨而斃十七人于獄范本才吏公事之暇好讀書延接諸生講學論文淮郡徭役繁重自范蒞任民隱悉上達後緣沈祭酒之獄聲名大損告歸浙東居一小樓終歲不下著書力闢王龍溪講學倍師嘗曰口頭禪不可謂禪口頭儒又安可謂儒蓋范爲陽明先生外戚深疾其門徒壞師說也

嘉靖中浙東趙祖鵬官翰林女嫁陸炳爲繼室倚陸



聲勢富貴擅一時其幼女甫笄艷而才己未准人丁  
士美舉狀元喪偶趙欲妻以女士美鄙其人拒不許  
時會元蔡茂春慕趙欲遂委禽焉一時清議皆重丁  
而薄蔡既而陸歿趙亦下獄蔡由郎署外謫罷歸始  
終皆坐贅趙一事不振蔡沒後趙尚在盛年以節聞  
王堯載典號龍懷萬歷丙子舉人官樂清令與同里  
劉海卿沈邱交好謂曰夜得子飲諸君酒告以夜來  
夢太乙星臨于室而生遂名一臨堯載聞之驚詫不  
怡衆詰之徐乃云子嘗夢與劉一臨同榜今此子裁  
降地子已向哀能久待乎自是每過海卿必抱膝呼  
年兄爲譚及丙子一臨年十六果與堯載同鄉舉當  
時以爲異後一臨卒于官喪歸堯載尚優游林下往  
撫其棺哭之

夏塗山曰瑚幼爲名諸生一日夜歸遇縣尹孫肇興  
于道左右以夜行執之不跪對以會文歸遲遂以草  
呈孫于馬上讀之不數行大驚曰卽發矣卽發矣子  
以此取科名拾芥耳因叩其居不遠同就書几更爲  
指點且曰如此破法不得元索篋爲易一破而去是



秋孫爲同考得塗山卷欲元之主者置第二此天啟  
丁卯也至辛未中探花

璐按孫肇興順治中官工侍

淮民編蘆作屋貧家皆然亦有精粗之別園林中偶  
置一區儼入畫圖許太守同安守淮愛之旣歸去仿  
爲之名曰淮屋客題詩曰淮人作蘆屋縛蘆爲椽椽  
磚擊省塗墍構櫺無刻鏤結構樸而雅庇治廉且便  
許君守淮陰但飲淮上泉歸來結淮屋亭午猶醉眠  
人言蘆爲屋嘗恐火誤然建章三月火豈亦蘆使然

又云不耐久風雨易漏穿此屋如傳舍次公皆非賢  
竹樓安在哉其名至今傳

王雷臣燮晚年頗信佛日誦金剛經不輟五十生日  
人贈詩云靜夜香燈明寶笈諸天梵樂護銀鈎蓮花  
世界非關汝肯向昆明笑白頭雷臣功名之士甲申  
後遯入空門

楊維垣成淮十九年善談制義一日署其門曰授小  
兒秘訣山陽一秀才夜間續題其左醫太僕官方揚  
見之失色急令洗去



劉節之孔和山東長山人明大學士鴻訓子少年慕  
俠詩文有奇氣好煮酒論兵結納死士散財聚眾子  
長白山殺偽縣令領數千人至淮安時劉澤清開藩  
淮上建牙新城節之同鄉有舊遂以兵屬後見澤清  
所爲不道屢侮之澤清怒令健兒二十人拉死之節  
之在新城與閻修齡靳茶坡友善時有倡酌死後修  
齡茶坡攜白金數百兩往尋其屍終不得節之有聽  
琴詩云高梧修竹曉沉沉待子垂簾拂素琴聽盡明  
光三十段碧池涼雨一時深想見五陵公子風致也

漁洋詩話載之

劉雪舫文昭新樂侯文炳之弟甲申侯闔門殉難雪  
舫年十五逃回海州故里變姓名至淮居珠湖吳嵩  
三物色之贈詩云王孫徒寂寞芳草自萋萋故苑遊  
麋鹿滄江厭鼓鼙人情隨世變風氣逐年低念子疑  
神久微陽可共攜明史孝純劉皇后生母卽雪舫之  
姑吳梅村詩亡姑脩宮掖吾父天家婚長兄進徹侯  
次兄拜將軍又云我兄聞再拜慟哭間皇靈寧同英  
國死不作襄城生我幼獨見存貧賤合依人云雪舫



避人袁浦與諸文士往還  
有河口夜泊詩云孤舟離  
緒又清明一掛蒲帆于里  
程去住向誰商出處飄零  
到我負平生雪連海氣天  
無色沙鼓河流夜有聲襍  
被春寒眠不穩淒然雙淚  
落三更

張虞山七夕琴歌序云楊太常名正經西陽宣慰司人初官總戎時大祀郊廟樂章失次宗伯林欲楫薦正經審音律改中書樂成晉太常賜漢琴唐琴各一亂後流寓淮海自製二操一曰西方思一曰風木悲爲作長歌按正經字懷玉家世爲將少有別解通樂

律懷帝名至便殿令彈琴稱善抱琴逃止故上主陳碧涵家時李子變爲淮安推官正經往見爲李上客李爲買宅又爲其子納婦于淮年七十餘卒葬城東黃土橋與碧涵祖墓鄰近陳氏每墓祭必置酒澆太常墓側淮人集中多聽太常彈琴詩平湖李因仲天植詩云淮海飄零值故知南州高士今何之謂碧涵也

王阮亭至淮招名士爲文酒之會見張虞山揖甫罷日夙愛足下南樓楚雨三更遠春水吳江一夜增之



句平生如此好詩復有幾虞山退語邱季貞曰夙昔  
快意之作不謂阮亭一見便能道出八古調堂集不  
載此篇從感舊集錄之春日張水部招遊江南留別  
同社話別空支半壁燈故人相約過延陵南樓楚雨  
三更遠春水吳江一夜增去就黃魚分野饌行看紫  
笋掛山藤他時遙憶羊求侶花滿晴龕向日蒸增韻  
漁洋詩話誤刊生字此詩爲虞山指名之作南齋選  
本刪之何耶

吳嵩三珊明諸生聊城令裴孫涇陽令安邦季子甲

申除夕召諸子曰汝輩知陶靖節乎三子默會其意  
會學使至不試落諸生籍遍遊天下遇名山大川傷  
今弔古一發之詩可備史料其後人秘之不出以示  
人靜齋檢討爲嵩三從孫每談當年軼事具足動人  
忠孝之心

張性符致中爲邑中名諸生博學工古文復社初興  
孫孟樸兩至淮羅致之與白素先受漆方與若能權  
同時入社制藝一時傳誦大會于吳中者二家故貧  
而收藏鼎彝碑版之文極富精小學辨證音體爲學



者所宗死後里人私謚恭壽先生所著有學志草學  
山草理學孱守錄經濟源流雖遙閣隨抄張氏宗政  
眉尹文集符山堂詩子三人弨弧設皆知名士弨卽  
力臣其所著今無傳本惜哉

顧亭林音學五書序云余纂輯此書三十餘年五易  
稿而手書者三已登版而刊改者數四又得張君臣  
爲之考說文采玉篇仿字樣酌時宜而手書之二子  
叶增叶箕分書小字鳩工淮上不遠數千里累書往  
復必歸於是又與潘次耕書曰著述之家最不宜以

未定之書傳之于人卽如近日力臣札來五書改正  
又一二百處觀此則音學五書力臣之功鉅矣後李  
安溪以五百金購之攜回閩中力臣符山堂藏書考  
訂最精版多善本身後散佚後多歸何義

力臣博學精詣嘗摹峴山石幢刻昭陵六馬圖贊辨  
痊鶴銘晚年窮困流離攜子孫居京師王漁洋題其  
小照云痊鶴銘邊携屐日羊侯祠下卸帆時吳山楚  
水探奇遍不覺秋霜點鬢絲金右遺文大放紛摩挲  
手卷對爐熏白頭更訪鴻都學手拓陳倉石鼓文徐



健菴詩云五岳曾探响嶺書年來雙髻轉蕭疎從誰  
辨得師春字好爲遺經正魯魚奇字揚雲未渺茫茂  
先家學在巾箱對君轉復思元嘆灑淚風前誦渭陽  
指亭林也力臣與程工部正父交善自京回南過德  
水偶詣正父已病篤力臣停舟且夕視疾經紀其喪  
亭林哭正父詩云十載故人泉下別交情多愧郅君  
章也指力臣也

男鍾琦恭校

茶餘客話卷十一終

茶餘客話卷十二

淮故

陳碧涵爲望社名士專精三禮淮士治禮經者多從  
之與階六黃門台孫爲兄弟名譽並著陳定生稱爲  
吾家二夫子一日過友書館中撫童子邱生之首云  
此子偉器他時當青於藍寒子水嗣每至館輒摩弄  
頭目爲戲邱卽南齋侍講也越十餘年同中式爲同  
年友邱旋入翰林陳久困公車及戊戌邱分校禮闈



卷十二  
闕禮記陳竟出其門執弟子禮甚恭迄今邱氏敦年  
誼而陳氏猶執世誼云

周左台以師範著稱毛西河作周母靳太君壽序云  
予嘗數准上君子孝醇友謹吾不如二邱瓌璋卓犖  
吾不如楊簡林嶽嶽饒經濟風流四襲吾不如蔡子  
搆而諸子皆出自左台之門靳太君爲茶坡女弟當  
時茶坡左台有靳周二子之稱

先徵君鶴緌先生手錄同社倡和詩內潘雪帆七律  
最多傑作雪帆名問奇錢塘人客居淮上隱淪終身  
與石霞舉紫嵐劉昭華及徵君爲忘形交後客死天  
寧寺揚州守傅澤洪墓之平山堂爲文誌其墓查二  
膽書丹遺稿甚富石氏舊有藏本徵君每過揚猶停  
舟携酒奠之

馬西樵蔡子搆樂六舞倪天章毛大可同飲黃大宗  
園中論詩天章謂張燕公澄湖山寺詩若使巢由同  
此意不將蘿薜易簪纓若使不將字當有誤不然語  
與意相反殊費解西樵曰不然君將前六句朗吟一  
過卽得之矣天章未解西樵曰不云禪室從來雲外



賞香臺豈是世中情乎大宗喜曰是不減匡鼎說詩  
天章猶本解大可曰西樵善說詩謂此山寺無復世  
中之情不啻雪外之地不必蘿薜始易簪纓一座稱  
善西樵纂杜詩分韻一書初覽之似無甚深意後覺  
唐人用韻與後人有迥不同者亦古音之蛛絲馬跡  
也乃知前人輯一書皆具深意

杜湘草工書法詩詞家于西湖嘴闢縮秀園水石花  
本之勝里于一郡名士滿座尊酒不空有孔北海之  
目至武林冒雪遊西湖適王丹麓來索書據案揮毫

忽方伯某移舟欲見湘草不納其刺命解纜移舟避  
之方伯大慚飲高澹人北墅題詞一時傳誦

望杜諸名士邀江浙勝流于重九大會于郡庠尊經  
閣馬西樵詩今古東南地論交海嶽通耆英千里至  
詞賦一時雄勝會登官閣華筵變楚風諸公沉醉後  
絲管徹高空

淮之文風至明末漸衰科名亦不振崇禎辛未艾東  
鄉公車過淮士人多以所業請政概不着筆惟吳太  
清數藝嗟賞不置語吳曰于加意精進十年文名冠



世矣吳遂執業稱弟子後吳卿薦造詣精純所傳知名士

嵇叔子精于子平自謂官止四品而夫人之祿位不稱舉孝廉卽喪偶媒妁盈門叔子排筭其八字俱以爲不類某富翁欲以女妻之先以年庚付一術士推之術士云此十惡大敗命翁以情告術士曰試易之何如因將生日移前數日而時干亦易通局俱變矣翁乃付媒往議叔子以手推之曰是恭人也遂成姻任杭州太守妻受四品封叔子卒後十餘年詣子將

爲母稱七十觴先期嘗辨恭人笑止云某曰非吾真生辰也因述其故家人皆驚蓋嵇氏父子爲所給者四十年矣

嵇叔子爲李太虛作閨園影賦數千言編珠貫玉地負海涵刻畫殆盡李携示趙洞門開心李叔則明睿各舌橋不下嵇美髯眉間一寸守杭州清介愛士四壁蕭然風雨不蔽郡有好古之士必折柬招致

金道洲人望令關中長武答鈕玉樵書云才到鶉觚剛剛一月欣傳鯉素耿耿生平感舊雨之彌新捧新



詩之溯舊鴻賓雁旅曾經十換星霜蟲臂鼠肝不啻  
重逢笑語沾青衫而欲濕是誠何心指白水以爲盟  
恭惟執事粵自君袍方綠予服猶緇佯羨馬上之鞭  
中多瓊環私挾懷中之錦會有逢迎詎料儀不下秦  
總由旁竇瑜何生亮都付荒唐思息我之有人遂易  
名而去國于時江邊解艫尚插征旗嶺上烽煙渾如  
毒霧艱虞萬里旣地老而天荒荏苒三年徒風悲而  
日慘兼之携來僮僕半墜于懊惱澤邊賣去琴書行  
吟于泊羅江畔辱藩侯之招簡問生涯原是之無竊  
駢語以飛翰操丹鉛何工四六節傭書之辛苦一歲  
累有千金填在任之遺亡白刼猶留殘喘謂斯人之  
不死絕意希榮念垂白之高堂奉甘唯祿爰束帶而  
重瞻三殿又極巍巍閭闔之觀下除書而分列五方  
偏處蕭瑟間關之地潘輿未遂毛檄遄征割邠國之  
一隅當邊陲之三面驛騷而罷于奔命歲儉而苦于  
頻仍地大如丸封函者此物居凹唯穴營窟者何嫌  
昔僅憂生于瘴癘今則坐敗于催科望之不解者一  
也憶彼炎疆十二城哀然居首俯茲馮翊三十長瞻



之在前豈鷄口之福難銷畢竟因差果錯乃牛後之  
羞旋至大似鼓震鐘鳴望之未解者二也願有請焉  
大可怪者羅池樹聳柑越臘而仍丹南服陽生花未  
春而盡紫蠻女擎荷包飯米無迨泮之時筒客擷簞  
裹鹽地有不死之草夫何三冬衣葛未聞范叔啼寒  
頓易五月披裘應被嚴陵叫屈望之未解者三也若  
就服食居處而言以及風土人情之變真堪發人一  
喙矣我長貧者矣借兄八洛老米三餐及弟八秦豆  
芽兩頓庭前朱荔偏間歲而方苞江上秋風甫踰時  
而不見今者一望周原百年幽地市無兼味官厨以  
剪韭爲豐圃乞蔬蔬土人以烹葵爲誕將使公劉囊  
底餽即稱珍燕令釜中塵仍是寶嗟乎噫嘻來日大  
難居者不易沈沈夜析如送鐵撥清淒種種顛毛怕  
聽銅琶劈裂謂鮑明遠擅蒼涼之調我則何人奉張  
燕公富制誥之才卿其雅匹胡爲淹滯尚尔昇棲謬  
荷長懷仰叨高誼走七百里之使者慰十八年之故  
人翻笑成悲情所必至銘感入骨口總難宣本同學  
之少年竟一官而老大聖明在上望吾兄于掖梧



栢之間局踣難容當念我于塞柳關榆之下道洲題  
堂柱曰家臨漂母千金地人到邠風七月天未幾以  
受代註誤去計其時止七閱月耳

李公凱鐵宰鐵嶺丁憂歸已未以鴻博徵授翰林官  
閣學經筵講書理明詞暢當時謂不減范祖禹一生  
清節不名一錢門無雜賓嘗語門人云孟子爲卿于  
齊終不受祿君祿且然况交際乎守身若此其嚴而  
彭更猶以傳食爲泰萬章至比于禦人之貨孟氏守  
身之嚴可知今人取與不恤多援孟子交以道接以  
禮之說以自便其私豈不謬哉

鹽城宋滋菴恭貽有詩才繪高孝子望親廬圖徧徵  
詩以褒之孝子父高特騁宿遷諸生由申棄家去其  
兄求之數年不得久之聞海上賣卜奇中兄往卜之  
云當卽相見察其情狀卽特騁也強之歸生一子尚  
友一日短衣持雨蓋出不知所之尚友長成數十年  
無消息遂築望親樓于鍾吾山中每遇過客輒詢訪  
聲泪並下宋經其地異之紀其事而繪圖焉  
金章字玉立善花鳥跗萼枝幹與夫飛鳴態度率有



生意設色最鮮灑今淮上亦未見其傳本馮仙湜續  
輯圖繪寶鑑采之又杭州人金章亦善墨竹今人多  
誤稱

湯調鼎清河人順治初進士著辨物志王阮亭稱其  
議論多發人神智癸酉秋余寓清兩月徧覓無有知  
是書者

斬壁星號茶坡樵子著渡河集閻再彭號飲牛叟著  
脊西堂集張養重號虞山逸民晚自廣南歸戴一柳  
子冠又號冠柳道人先是丁亥秋有三子秋心之刻

興化李小有序之小有自稱虛天游

李吉爰時謙初爲潞安推官歷樂陵潞城二縣有清  
白名擢御史端方廉毅前後疏凡數十上陳澤州王  
阮亭皆以師禮尊之引疾歸起陝西觀察會飢出監  
賑孤介不名一錢未幾卒將軍督撫以下往弔蓬蒿  
滿庭咸揮淚買棺而歸其喪于淮聞公之初歸也以  
言事忤輔臣頗有扼之者返里後不見一客守合屢  
侵侮之公槩不置問及當路者誅特召起用兩臺敦  
迫就道邑令某懼甚日三至門悔罪之狀至甲屈公



相待如初若無前隙者

劉六皆官刑曹時與猗氏衛不錫既齊同巷交密衛撫黔以苗變得罪戍黑龍江六皆爲經畫行李歲時餽問不絕逾年召還後復派修高家堰六皆亦返里矣白首如新交契彌篤及衛病作孤苦無依倚一日顧張石虹編修云吾殆不起當詣六皆作身後計卽由袁浦舟至篋園尚能飲酒盡歡次日竟歿六皆經紀附身之具甚厚破別業爲殯堂哀禮交至今人增友誼之重

閻潛邱遺書惟四書釋地三續宋商邱刻于吳校正困學紀聞馬秋玉刻于揚州其尚書古文疏證孔廟崇祀未議孟子生卒年月考則里刻人之孫學林刻潛邱劄記如日知錄補止喪服翼註毛未詩說續朱子古文疑宋劉攽李燾馬端臨王應麟四家逸事皆未刊劄記乃未定書零箋碎紙投入一笥捐館後家人與計簿混入笥中學林不知抉擇將他人往還手蹟及陳言狎語遊戲之詞悉條舉而刻之砭玉並陳大失潛邱面目予嘗刪存十之五六卓然可傳不朽



又徐健菴嘗手輯潛邱緒論一編曰閻氏碎金皆洞  
庭書局中辨論之事今無傳又傳湖掌錄一書吳山  
夫少年時猶見抄本子尋之二十年無有知是書者  
王漁洋稱其博雅精核手錄其盤谷一條辨李愿非  
西平子亦全鼎之一巒也附錄于此按昌黎年譜貞  
元十七年公在京師作送李愿歸盤谷序觀序言益  
不挂朝籍者安得如唐書李愿傳所載乎一也退是  
有盧郎中送盤谷子詩和歌云昔尋李愿向盤谷當  
又在貞元八年退之未第前故得入太行訪隱淪是

時西平尚在愿安得隱此二也又和歌云開緘忽賭  
送歸作字向紙止皆軒昂又知李侯竟不顧方冬獨  
入崔嵬藏則知序作于是年冬蓋愿嘗隱盤谷茲來  
遊長安不得志故序曰送歸豈得如傳所稱勳伐乎  
三也貞元中濟源令刻此序盤谷石上後書云昌黎  
韓愈知名士也高愿之賢故序而送之此當日擊其  
事者僅稱之曰賢無一語鋪張其人地四也李愿傳  
晟立功時諸子未官宰相以聞即日召授太子賓客  
上柱國考晟傳廣德初擊党項有功卽所謂有功時



也下距貞元己巳歷官三十九年矣安得如序所云  
耶五也退之辛巳冬尚在京叅調明年始授四門博  
士唐人最重官爵安得與歷官三十九年者雁行曰  
友人某耶六也愿傳邇聲色而政衰又云結納權近  
官貨隨賂輒盡其人如是安得吐高論俾退之聞而  
壯之七也西平洮州臨潭貞元七年辛未以臨洮未  
復請附貫萬年詔可是愿當爲長安人安得于濟源  
之盤谷曰歸乎哉八也此見于居易錄所載愿非西  
平子前人亦曾論及而未有如是之核按漁洋北征

日紀云頃讀李川父嵩渚集遊盤山記稱愿行寔無  
考愿卽西平長子唐書有傳川父號博雅何疎于考  
証如此云云蓋彼時阮亭尚未讀潛邱掌錄故輕訾  
川父晚年一見急劄志之也又劄記云唐裴度作西  
平王李公神道碑銘云有子曰愿故檢校司空河中  
節度使贈司徒五列雄鎮三爲上公則益無隱淪之  
理

戴晦夫晟頤在瞻謁楊禹江開沅同受業于黃梨洲  
門以古學相勵南雷文定古文授讀皆西洮兄弟所



梓行梨洲初選明文案搜羅家藏家集千餘種嗣從  
徐崑山假傳是樓藏書又三百餘家于是益文案爲  
文海文海中摘加硃圈以授子百家讀是爲明文授  
讀板藏戴氏在瞻少時著陸傳習學錄頗謗陸王及  
自甬上歸語門人云吾向日一知半解心粗胆大妄  
議先儒今從黃先生遊乃知半生全在夢中遍索所  
抄傳習錄焚之與禹江訂讀經史法求寔學戒空談  
後生翕然從之

丙子游鹽濱見卞氏園中枯枝牡丹高出牆花開數  
百朵卞進士樂云相傳是宋時物六百餘年不能詳  
所自予按澠水燕談載海陵西溪鹽場呂文靖公嘗  
官于此手植牡丹一本有詩刻石後范文正文嘗臨  
蒞題一絕句人以二公詩筆貴重護以層闌歲久茂  
盛每歲花開可百朵爲海濱奇觀宋時鹽場皆在今  
之下河鹽邑范公堤皆文正公所築卞氏之花云是  
宋物或卽二公所植未可知也海陵卽今之秦州東  
西數百里皆是卞元亨元從張士誠屢諫不聽歸隱  
海濱明太祖平吳後屢徵不出作詩有恐使田橫客



笑人之句明祖怒遣戍遼陽將行以酒酬牡丹曰待  
我南還花再開自是花果不復開妾棲息園中朝夕  
對花祝云主人有還信當再着花如是十年花忽大  
放元亨果遇赦還復作詩云牡丹曾是手親栽十度  
春風九不開多少繁華零落盡一枝猶待主人來蓋  
予具妾之守貞也後有一姦使奪之去移之揚州署  
中花竟萎棄之卞氏宛轉取其枯枝植之園中久之  
竟生遂以枯枝名每歲花開紅紫各色或秋冬著花  
有紅有白以此卜休咎獨醒雜志一則維揚后土廟  
有花潔白而香號爲瓊花宣和間起花石綱因取入  
御苑逾年不花乃杖之遣還其地花開如故此與卞  
氏牡丹事絕相類而近在三百里內崛強猶主人物  
不異古今一致

淮安守朱定元謹飭有守大吏惡之將欲告罷會大  
吏入覲

上問江南知府才守倉猝不記一人遂以朱名入奏  
不久擢至閣學

翮梧字待翁豪士也以薦歷官至潞安守謝事後值



山右虧空案起後今人人不自保待翁首倡捐貲卽  
日遣其子倡歸棄田宅得十萬金裝三十騾馱至太  
原待質各官及囹圄中追比之員皆獲更生當時義  
聲振河北矣湯西崖贈詩喜子膺薦書治行歷寮案  
謁帝蓬萊宮賜衣光翠彩

查夏重集贈僧元立詩序云元立上人淮陰張氏子  
幼隨父客京師父歿權厝天津且死屬其子曰必反  
吾骨故鄉時元立甫九歲不能自存去而爲僧得法  
于平陽畫公今五十年矣辛卯秋從旣北來求父墓

處天津瀕海沙衝不可辨有里老張姓依稀指其處  
發視墓磚在焉桐棺無恙將奉以歸墓相見京師乞  
一言紀事爰贈以詩

丁卯周蓼圃檢討齋偶爲扶鸞之戲紫坪年十四時  
供果中有西瓜子紫坪漫撮而問之乩筆曰三八之  
數開掌數之則二十四枚也復撮問曰仍前數數之  
則三十八枚復撮少許問之曰仍前數數之則十一  
枚漫取不數而亦能奇中豈邵子之說不盡然耶

唐肅宗本紀載楚州獻寶玉十三收元寶應今白田



縣名本此一日黃天符其製上圓下方近圓有孔歲  
戊辰有得以八頁者

御製詩云方水生瑤瑾雲英靜似腴截肪安可喻烝  
栗得曾無猶見先王制如逢君子儒何須檢唐史附  
會詔天符

吳山夫學有本原館秦樹峯司寇家五禮通考皆其  
手訂者樹峯嘗言得三異人山夫其一也丙子丁丑  
授八旗教習作十憶詩一時傳誦內有憶手鈔山陽  
蒼舊詩二首其小序云吾淮詩人漢枚都尉始其詩

卽古詩十九首中之十首也十九首爲古詩鼻祖而  
半出都尉手宜淮詩之傳世多矣乃漢魏唐宋尚有  
傳人自元後無可指名者明代流傳亦少予求之數  
十年于宋元得三家於明得數十家手自抄寫積爲  
五大冊仿元氏中州集意人各詳其姓字官階時代  
先後間論次其逸事名曰山陽蒼舊詩將上附枚乘  
陳琳趙嘏張耒諸集合而梓之以存吾鄉文獻又得  
本朝詩集十餘種鈔錄未竟以出游置之至今爲胸  
中一末了事雖余力薄未必卽能有成然藏壑之舟



有力者負之以趨不難也特恐兒子輩不知愛惜使予心力付之飄風劫火功未就而罪已莫解卽得好事者再爲搜輯益日遠而日難矣山夫著書甚富已刻者僅別雅一種乃其小作晚年自言其書不足觀以予所見尚有六書引經考六經述部序辨金石存正字通正山陽志叢辨四朝黃河圖說剛定潛邱劄記皆可傳者其所藏金石碑版文尤富其山陽耆舊詩五冊予於壬寅歲假歸適先生次子與紫坪子鍾琰回八學因得索其遺書止存二大冊耳予購得之以待好事者補輯之

盲女琵琶元時已有之至今江淮尤甚京師近年亦多少年游閒者藉以佐酒消遣不異青樓吾鄉揚幼鳧廣文年七十致仕回里飢餓不能出門戶後羣盲曰造其門資其飲饌筠籠蠻榼窮極豐腆人不解其故久之知廣文以歌曲擅長多取耳聞目見之事演爲彈詞新聲綺調盲女以先得者聲價頗高廣文遂藉以娛老焉元瞿存齋過汴梁詩陌頭盲女無愁恨能撥琵琶說趙家又陸放翁詩斜陽古柳趙家莊負



鼓盲翁正作場育女瞽男由來舊矣

甲戌上元夜陳玉盟儀部大復招集鄉人爲文酒之會中席一贊郎突至面目淨瘳語言誕妄同座皆心惡之吳南生投箸大嘔先去惟陳東巖柱飲啖自若終席不接一談既散諸君詆訕百出東巖亦不置一語若不知其事余甚服其雅量某後選楚令擢州牧以貪伏法

國初郡城園亭見于詩文者甚多今遺址無考以予所知略識于此新璧星茶坡草堂在新城河北閻牛

叟眷西堂在新城東門張養重虞山古調堂劉勃安昭華綠筠草堂在駙馬巷陳階六鵬笑齋在南市橋劉僉事初菴思園黃園中有黃山在菜橋茶巷閣修齡再彭眷西堂金石夷嘉樹軒在新城又一蒲菴影閣鷓巢鶴墩在平河橋又西爲飲牛草堂張鞠存吏部毅文檢討花廳在北門內依綠園在蕭湖中有雲起閣曲江樓黃甫及鴻臚蘭岩觀察舫閣止園梅花嶺在蕭湖徐山琢侍郎家南門大街其華平園有容園嶺雲閣在郭家墩邱曙戒侍講南齋李貞洗馬西



軒玉蕊亭皆為桐園之一在西長街倪天章一草亭  
張泗水漪園杜首昌湘草縮秀園在湖嘴有掃塵亭  
如如室天心水面亭黃翁谿梅花屋藕塘萬年少溪  
東村屋在河下又濕西草堂在北門西岸馬孝廉西  
樵清奕軒不離草堂在隆興寺塔南徐勤盈橫秋閣  
高臥堂白賁堂張力臣符山堂在清江浦樂六舞臺  
廬姜本生息園邱且菴東里山莊張赤岸竹堂許念  
中黃門來鳳軒南樓在八字橋程徵君水南菰蒲曲  
在伏龍洞程爽林孝廉誰莊小人堂在城東莊外戴  
晦夫寤硯齋在西長街楊彙征南村草堂在府學東  
楊廣文棋益大椿樓博士孝廉景西晴霞山房老樹  
軒皆在南門大街沈厚肇移雲堂崔鴻臚春水樓在  
湖嘴陳曾餘明經墨莊瀟碧亭在駙馬巷吳子通樸  
山天竺齋海棠屏陳謂敬淇園徐日馭北山草堂劉  
萬資萬吹兄弟竹素園頌酒草堂邊壽民葦間書屋  
蓮葉仙舟在梁皮橋陸觀察密菴月湄孫竹民素園  
皆在北門內周徵君白民清來室止止齋在雙刀劉  
巷高明經思亭亦愛廬考園在丁光橋先徵君鶴緜



先生宅在新城宅內有水園南有山園曰冬青樓雙  
東軒經堂修竹廊自吟亭古香樓松石齋十餘處又  
夏雲草堂在東村藍邱草堂在南莊先大夫于壬申  
歲移居城西北隅家塾東曰咏素齋西曰七錄齋爲  
愚兄弟讀書處勺湖州堂則水面數椽講學論文之  
所其春風亭瓣香書屋魯頌亭皆門弟子所增葺也  
略按勺湖州堂繪圖徵詩余賦四律爲先生所許  
補梓

茶餘客話卷十二終

男鍾琦恭校

已亥夏余與司寇吾山先生同膺司諫之選光後八  
臺過從無間每春朝讌集酒邊談論前言往行聽者  
忘還固未知其有所著述也嗣讀行述有茶餘客話  
之輯王少林太守亟稱其書今夏從方浦大兄借觀  
其記前型搜逸事考証典物多有未經人道爲說部  
諸家所不及者爲選十二卷梓行是書成于辛卯之  
前故云文淵閣無其地本朝尚無三元癸巳建閣以  
及辛丑錢修撰榮及第亦未補錄知此稿固未成之  
書也且卷中深以在閣日淺不及徧觀庫藏典冊爲



歎昔余科垣夜直恒秉燭繙史錄書盈尺竊與先生  
有同嗜曾于先生所換刑部典試題名二書多所校  
正惜公早騎箕不及參訂客語全書不無遺憾顧方  
浦負荷念切行將與七錄齋詩文全集合刻流傳嘉  
惠藝林更樂得而觀厥成焉甲寅上元烏程戴璐跋

先司冠束髮受書卽耽吟咏於書無所不讀所著  
詩文集如千卷藏于家中歲以命入八直綸閣歷  
卿垣僦居長安藏書最富手不停披彈心著述與  
一時賢士大夫遊賓客過從煮茗劇談靡間寒暑  
凡所得于載籍以逮聞見所及輒誌之積二十年  
成茶餘客語三十卷所記自經史及

國朝典故淮陰事蹟下及書畫禽魚之類靡不講貫  
精核獨出已見論斷而折衷之已酉捐館後謹錄  
收藏版行匪易中心竊負疚焉奉常蕨塘先生爲



先司寇臺選同年交好無間今春索閱此書詳知  
校正欲公同好先選十二卷彷彿畢昇活字板印行  
餘卷仍謹藏以待再梓琦愧不能讀父書幸先生  
精鑿流傳先司寇願以不朽而先生敦情古處  
以及沾溉士林之誼亦足以風世矣爰敬跋于後  
癸丑小除男鍾琦謹識



